

六朝事迹編類
下



六朝事迹編類下

新安張敦頤編

山岡門第六

石碗山

碗牛
委切

輿地志云秦始皇時望氣者云江東有天子氣
乃東遊以厭之又鑿金陵以斷其勢今方山石
碗是其所斷之地也孫盛云東至方山有直瀆
自瀆至北山或云是秦所掘山今方山西九里
有大龍枕淮合龍悉是石名石碗京師溝渠之
石悉鑿此龍取之在城東南四十五里

天關山

晉元帝即位起宮殿城闕郭璞云闕不便王導
乃指牛頭山爲天關楊脩有詩云牛頭天際碧
凝嵐王導無稽示妄談若指遠山爲上闕長安
應合指終南

鳳臺山

宋元嘉中鳳凰集于是山乃築臺于山椒以旌
嘉瑞在府西南二里今保寧寺是也唐李白詩
曰置酒延落景金陵鳳凰臺長波寫萬古心與
雲俱開昔時有鳳凰鳳凰爲誰來鳳凰去已久

正當今日回明君越義軒天老坐三台豪士無
所用彈琴醉金壘東風吹山花安可不盡杯六
帝沒幽草深宮冥綠苔置酒勿復道歌鍾但相
催又詩曰鳳凰臺上鳳凰遊鳳去臺空江自流
吳時花草埋幽徑晉國衣冠成古丘三山半落
青天外二水中分白鷺洲摠爲浮雲能蔽日長
安不見使人愁宋齊丘有詩云嵯峨壑洪泉峩
峩峩峩皆城郭山蹙龍虎健水里螭蜃作白虹
欲吞人赤驥相搏爍畫棟泥金碧石路盤繞堦

倒挂哭月猿危立思天鶴鑿池養蛟龍栽桐
鸞鷲梁間鸞教鷓石罅蛇懸殼養花如養賢去
草如去惡日晚嚴城鼓風來蕭寺鐸掃地驅塵
埃剪蒿除鳥雀金桃帶葉摘綠李和衣嚼貞竹
無盛衰媚柳先搖落塵飛景陽井草合臨春閣
芙蓉如佳人回首似調謔當軒有直道無人肯
駐脚夜半鼠勃窣天陰鬼敲椽松孤不易立石
醜難安著自憐咏木鳥去盡終不錯晚風吹梧
桐樹頭鳴曝曝我我江令石青苔何淡薄不話
興亡事舉首思眇邈吁哉未到此福劣同尺蠖

籠鶴羨鳧毛猛虎愛蝸角一日賢太守與我觀
橐籥往往獨自語天帝相唯諾風雲偶不來寰
宇銷一略我欲烹長鯨四海為鼎鑊我欲取大
鵬天地為矰繫音勺縷也絲安得生羽翰雄飛上寥
廓其詩刻今在保寧寺

覆舟山

寰宇記云在城北五里周回三里高三十一丈
東接青溪北臨真武湖狀如覆舟因以為名輿
地志云宋元嘉中改名真武山以其臨真武湖
山復有真武觀故也晉北郊壇宋藥園壘樂遊

苑冰井甘露亭皆在此山

幕府山

寰宇記云在城西北周回三十里高七十丈東北臨直瀆浦西接寶林山南接蟹浦輿地志云臨沂縣東八里有幕府山寰宇記云晉元帝自廣陵渡江建康城荒落以府第居縣北山下因以幕府山為名圖經則云丞相王導建幕府於此山因名之山上有虎跑蒲包切泉其西巔有仙人臺宋明帝高寧陵在山西王道守溫嶠亦葬山西又按寰宇記云陳武帝破北齊軍四十六

萬於幕府山下至後主禎明中嘗幸此山校獵虞世南獻賦以美之楊脩有詩云六代繁華一瞬間平蕪遠樹不勝閑倚樓天暝雲如幕知是琅邪幕府山

鷄籠山

寰宇記云在城西北九里西接落星澗北臨栖玄塘輿地志云鷄籠山在覆舟山之西二百餘步其狀如鷄籠因以為名按南史宋文帝元嘉十五年立儒館於北郊命雷次宗居之次宗因開館於鷄籠山齊高帝嘗就次宗受禮及左氏

春秋又竟陵王子良嘗移居鷄籠山下集四學士抄五經百家爲四部要略千卷又按宋文帝元嘉中改爲龍山以黑龍嘗見真武湖此山王臨湖上因以爲名今去縣六里晉元帝明帝成帝哀帝四陵皆在山南中有佛寺五所

方山

寰宇記云山高一百一十六丈周回二十七里圖經云四面方如城東南有水下注長塘流漑平陸又按輿地志云湖熟西北有方山頂正上方上有池水山謙之丹陽記曰山形方如印故曰

方山亦名天印山秦始皇鑿金陵此山是其斷者文選謝靈運東出鄰里相送至方山靈運嘗賦詩其略云解纜及流潮懷舊不能發又按南史宋何尚之爲尚書令元嘉末致仕於方山著退居賦以明所守議者咸謂尚之不能固志後果然又按齊武帝嘗幸方山顧左右曰朕欲經始山之南復爲離宮期勝新林苑徐孝嗣荅曰繞黃山款牛首乃盛漢之事今江南未廣願少留神乃止圖經謂齊武帝於方山築苑不知何所據而云

攝山

寰宇記云周回四十里高一百三十二丈東連畫石山南接落星山陳江惣攝山栖霞寺碑云南徐州琅邪郡江乘縣有攝山其狀似繖亦名繖山尹先生記云山多草藥可以攝養故以攝爲名南史齊明僧紹住江乘攝山今栖霞寺即其宅也今去城四十五里

東山

上元縣有兩東山一在崇禮鄉今土山是也晉書謝安寓居會稽棲遲東山此安之舊隱也後

於土山營築以擬東山今去縣二十里一在鍾山鄉蔣廟東北宋劉劭隱居之地南史劭嘗經始鍾嶺以爲棲息及造園宅名爲東山今去縣十五里陳軒金陵集載李白李建勳東山詩皆指土山而作

白山

圖經云舊屬江乘縣周回八里高八十丈東接竹堂山南接蔣山北連攝山西有水下注平陸輿地志云階礎碑石悉出此山南史梁散騎常侍韋載有田十餘頃在江乘縣之白山天嘉元

年遂築室而居屏絕人事不入籬門者十載今去縣二十里

濁山

圖經云在溧水縣東南十里高一十丈周回五里山北濁水出焉輿地志云溧水縣有濁山下有濁水即秦淮之源也

湯山

寰宇記云在縣東北其西接雲穴山山不甚高無大林木有湯泉出其下大小凡六處湯澗繞其東南四時常熱禽魚之類入者輒爛以煮豆穀終日不熟草木濯之轉見鮮茂舊有湯泉館今廢去縣五十里

大壯觀山

圖經云在城北一十八里周回五里高一十八丈東連蔣山西有水下注平陸南臨真武湖北臨蠡湖舊經謂陳宣帝起大壯觀於此山因以為名南史宣帝太建十一年八月幸大壯觀因大閱武命都督任忠領步騎十萬陣於真武湖上登真武門觀宴群臣因幸樂遊苑設絲竹之會仍重幸大壯觀振旅而還

臨沂山

圖經云在城東北四十里周回三十里高四
丈東北接落星山西臨大江西南有舊臨沂縣城

祈澤山

舊經云初法師嘗結茅於此有龍女來聽講既
而神泉涌於溝座下後遂為祈禱水旱之所山
因此得名高五十丈周回十里東連彭城山北
連青龍山今去縣二十三里

東廬山

圖經云在溧水縣東南二十五里高六十八丈

周回二十里有三源一源出山西流入秦淮一
源自山東北流入馬沉港一源自山東南吳漕
流入丹陽湖丹陽記云溧水縣東有廬山與丹
陽分界俗傳云以廬舍為名又云嚴子陵嘗結
廬於此

廬龍山

圖經云在城西北一十六里周回五里高三十
六丈東有水下注平陸西臨大江舊經云晉元
帝初渡江到此見山嶺連綿接石頭城真江上
之關塞以此地廬龍因以為名

馬鞍山

圖經云山以形似得名西臨大江東與石頭城相接南史陳後主禎明三年隋將濟宜黃侯慧紀自荊州帥將士沿江而下欲趨臺城遣南康太守魯肅將兵以鐵鎖橫江隋將楊素奮兵擊之爭馬鞍山四十餘戰隋軍死者五千餘人今去城十里

大巫山

圖經云在溧陽縣北四十五里周回二百五十步高八丈長塘湖內接鎮江府金壇縣界

小巫山

圖經云在溧陽縣東北二十五里周回四里高五丈長塘湖內石上有獸跡

平陵山

圖經云在溧陽縣西北三十五里高三丈周回三里晉書云永和三年李閔斬韓晃蘇逸於此

鐵冶山

圖經云在溧陽縣西南七十里周回二十里高一百八十丈輿地志云前代鐵冶山

絳巖山

圖經云在句容縣西南三十里周回二十四里
高一百六十五丈上有龍坑祠壇江南地志云
漢丹陽縣北有頽山其山赤因爲郡名本名亦
山唐天寶六年改名絳巖山

竹里山

圖經云在句容縣方輿地記云行者以其途傾
嶮號曰翻山峴鮑昭有行翻車峴詩即此山也

大城山

圖經云周回二十二里高八十二丈南接符堅
山西接鴈門山北接竹堂山今去城七十里

均王祭山

東晉成帝於北郊以白山鍾山配四十四神之
數兼祭之按通典梁武帝省四望座惟鍾山及
松江浙江五湖白石山並存之

白土岡

圖經云北連蔣山其土色白因名之輿地志云
同夏縣西有白土塾即此地按北史隋賀若弼
嘗破陳軍於蔣山之白土岡今蔣山西北有岡
壠土色正白乃其地圖經云在縣東二十二里
非是蓋同夏縣在今縣東十五里而白土岡在

同夏之西不應有二十二里之遠也

白楊路

圖經云縣南十二里石山岡之橫道是也六朝雜事云宋袁粲常酌於此忽逢村父便留連笑語人恠而問之荅曰吾侶偶遊非知音也楊脩有詩云殘枝敗葉幾霑春莫問栽培迹已陳細雨斜風馬無力蕭蕭滿路更愁人

千佛嶺

在攝山栖霞寺之側按江摠栖霞寺碑明僧紹居士子仲璋爲臨沂令於西峯石壁與度禪師

鑄造無量壽佛大同二年龕頂放光齊文惠太子豫章文獻王竟陵文宣始安王及宋江夏王霍姬齊田奐等琢石連像梁臨川靖惠王復加瑩飾嶺之中道石壁有沈傳師徐鉉張稚圭王雱題名

謝安墩

在半山報寧寺之後基址尚存謝安與王羲之嘗登此超然有高世之志李太白將營園其上乃作詩曰晉室昔橫清永嘉遂南奔沙塵何茫茫龍虎鬪朝昏胡馬風漢草天驕感中原哲匠

感顏運雲屏忽飛翻組練照楚國旌旗連海門
西秦百萬衆戈甲如雲屯投鞭可填江一掃不
足論皇運有迈正醜虜無遺魂談笑遏橫流蒼
生望斯存冶城訪古跡猶有謝安墩憑覽周地
險高標絕人喧想像東山姿緬懷右軍言梧桐
識佳樹蕙草留芳根地古雲物在臺荒禾黍繁
我來酌清波於此樹名園功成拂衣去歸入武
陵源王荊公詩云我名公字偶相同我屋公墩
在眼中公去我來墩屬我不應墩姓尚隨公

桃花塢

在蔣山寶公塔之西北舊有桃花甚盛今不復存

方山埭

建康實錄吳赤烏八年使校尉陳勳發屯曰兵
於方山南截淮立埭號方山埭又按南史湖熟
縣方山埭高峻冬月行旅以為難齊明帝使沈
瑀修之瑀乃開四洪斷行客就作三日便辦其
埭今去城四十五里

鷄鳴埭

建康實錄青溪有橋名募士橋橋西南過溝有
埭名鷄鳴埭齊武帝早遊鍾山射雉至此鷄始

鳴圖經云今在青溪西南潮溝之上又按南史齊武帝永明中散遊幸諸苑載宮人從車至內深隱不聞端門鼓漏聲置鍾景陽樓上應聞鍾聲並早起糝飾帝數幸琅邪城宮人常從早發至湖北埭鷄始鳴故呼爲鷄鳴埭若爾其埭又當近北父老傳云今清化市真武廟側是其處也二埭恐皆當時所歷姑兩存之

鑄劍坑

圖經云在溧陽縣南八十里石屋山之西舊經云昔吳王使歐冶子鑄劍於此

射雉場

圖經云在縣東二十里齊東昏侯置射雉場五百所皆以七寶裝翳楊脩有詩曰外作禽荒內色荒三千紅粉日嚴糝潘妃縱有嫣然態不步金蓮到射場

絕地

圖經云在縣南三里古大社西有凶地三畝晉周顛司馬秀蘇峻皆宅于此悉以禍敗宋王僧綽曰大丈夫當以正道自居何宅之有凶吉尋爲元凶所害楊脩有詩曰四主衣冠今不終高

門列戟謾重重由來瘠沃分勞逸莫道人凶非
宅凶

山岡門第六

宅舍門第七

孔子巷

輿地志云孔子廟在樂遊苑東隔青溪本聖亭
侯所奉之廟也舊在溪南丹陽郡之東南本東
晉所立中廢宋元嘉十九年詔復孔子廟至齊
遷於今處以舊地為浮圖今名孔子寺亦名孔
子巷在城東南五里古長樂橋東

言偃里

史記孔子弟子列傳言偃字子游吳人今不知
其里所在或云在城東二十二里

四學

南史宋文帝元嘉十六年立儒學館於鷄籠山
命雷次宗居之因集丹陽何尚之立玄素學者
作佐郎何承天立史學司徒參軍謝玄立文學
各聚門徒多就業者江左風俗於斯為美焉

陸機宅

建康實錄云陸機入洛作懷舊居賦云望東城
之紆徐邈吾廬之延佇李太白題王處士水亭
云齊朝南苑是陸機宅其詩云王子耽玄言賢
豪多在門好鵝尋道士愛竹嘯名園樹色老荒

苑池光蕩華軒北堂見明月更憶陸平原掃地
青玉簫為余置金樽醉罷欲歸去花枝宿鳥喧
何時復來此再得洗蹠煩圖經云在縣南五里
秦淮之側

江令宅

陳尚書令江總宅也建康實錄及楊脩詩注云
南朝鼎族多來青溪江令宅尤占勝地後主嘗
幸其宅呼為狎客劉禹錫詩云南朝詞臣北朝
客歸來惟見秦淮碧池臺竹樹三畝餘至今人
道江家宅今城東段大夫約之宅正臨青溪即

其地也故王荆公詩云昔時江令宅今日段侯家此可驗也

沈約宅

南史梁沈約遷尚書令雖名位隆重而居處儉素立宅東田矚望郊阜嘗為郊居賦以叙其事東田在鍾山之下也

孫瑒宅

建康實錄陳起部尚書孫瑒居處奢豪宅在青溪東西即江惣宅瑒家庭穿築極林泉之致歌鍾舞女當世罕儔

劉子珪宅

南史齊劉瓛字子珪居于檀橋瓦屋數間上皆穿漏永平七年竟陵王子良表武帝為立館帝以楊烈橋故主地給之檀橋在今縣東二十五里青龍山之前

朱异宅

南史梁朱异及諸子自潮溝列宅至青溪其中有臺池玩好每暇日與賓客遊焉

諸葛恪宅

圖經云在縣東二里古元風觀前南接青溪里

俗傳云在今縣東南百餘步面對青溪其東即江令宅也

宋齊丘宅

舊傳在鎮淮橋之北御街之東今南比較務是也其後又爲南唐國子監

杜姥宅

建康實錄晉成帝恭皇后杜氏母裴氏即杜弘冶之妻也裴氏名穆孝武帝封爲廣德君初穆渡江宅於南掖門外時裴氏壽考故呼爲杜姥圖經云在舊縣東北三里舊縣在冶城今天慶

觀之東是也其宅未詳所在

烏衣巷

王榭金陵人世以航海爲業一日海中失船泛一木登岸見一翁一媪皆衣兒引榭至所居乃烏衣國也以女妻之旣久榭思歸復乘雲軒泛海至其家有二燕棲於梁上榭以手招之即飛來臂上取片紙書小詩繫於燕尾曰誤到華胥國裏來玉人終日苦憐才雲軒飄去無消息洒淚臨風幾百回來春燕又飛來榭身上有詩云昔日相逢冥數合如今睽遠是生離來春縱有相

思字三月天南無鴈飛至來歲竟不至因目榭
所居爲烏衣巷劉禹錫有詩曰朱雀橋邊野草
花烏衣巷口夕陽斜舊時王謝堂前燕飛入尋
常百姓家此覲圖經云在縣東南四里晉書王
導紀瞻宅皆在此巷

乘黃署

輿地志云在東府之西北五輅及朝車凡駕馬者
之所去縣東北六里

紙官署

輿地志云宋永初中立舊日齊帝嘗於此造銀

光紙以賜王僧虔在縣東一十五里

扶南樂署

建康實錄吳赤烏七年扶南國獻樂人於此置
舍以教宮人在縣北二里

銅螭署

臺城刻漏署西本洛陽之舊物宋平姚秦遷於此
魏明帝爲太子時翫以玉手板刺螭口中因入
不出後人常見白螭涎在其中梁元帝移之江
陵此物後遂不復見楊脩詩云挈壺傳箭逼天
聰鑄出蟠螭巧範同何事腹中藏恠物人驚螭

蜓氣如虹

錦署

圖經云在縣東南十里宋遷百工於此也楊脩詩云人衣縑縷地衣紅不念家家杼抽空厥篚織文應歲貢更翻新樣集機工

焚衣街

齊東昏侯自製服爲四種冠五私袍一月中二十餘出辰出三更歸夜出清晨迈梁自襄陽出師廢之焚奢淫服六十二種於御街中楊脩詩云雉頭金縷及珠胎煙緒香雲書不開御路傍

人皆歎息逡巡紅焰作青灰

宅舍門第七

識記門第八

秦淮石誌

保大中浚秦淮得石誌按其刻有大宋乾德四年凡六字他字磨滅不可識今諸儒參驗乃輔公祐反江東時年號

太祖受命國號宋改元乾德江左始衰弱豈非威令將及而符讖先著也

石印

天璽元年歷陽山石文理成字凡二十云楚九州渚吳九州都揚州士作天子四世治太平始

江表傳曰歷陽縣有石山臨水高百丈其三十丈所有七穿駢羅穿中色黃赤不與本體相似俗相傳謂之石印又云石印封發天下當太平下有祠屋巫祝言石印神有三即時歷陽長表上言石印發皓遣使以太牢祭歷山巫言石印三郎說天下方太平使者作高梯上看印文詐以朱書石作二十字還以啟皓皓大喜曰吳當爲九州作都渚乎從大皇帝逮孤四世矣太平之主非孤復誰重遣使以印綬拜三郎爲王又刻石立銘褒贊靈德以答休祥此見吳志注

石室

吳興陽羨山有空石長十餘丈名曰石室在所表爲大瑞皓乃遣司徒董朝太常周處至陽羨縣封禪國山明年改元天紀大赦以協石文

三斷石

吳後主天冊元年掘地得銀長一尺廣三分刻上有年月字又於吳郡臨平湖邊得一石函中有一小石青白色長四寸廣二寸刻上作皇帝字於是改元天璽遂立石紀吳功德按實錄云縣南三十里西接牛頭山丹陽雲巖東路有大

碣石長二丈折爲三斷此紀功之碑也今移在
府治中可辨者二百餘字漫滅者五十餘字楊
脩詩曰孫吳紀德舊刊碑埋沒蟠螭與伏龜惆
悵石岡三斷在至今猶似鼎分時

寶公銅牌記

按高僧傳公諱寶誌宋元嘉中現形於東陽鎮
古木鷹巢中朱氏聞巢中兒啼遂收育之因以
朱爲姓施宅爲寺公自少出家依子鍾山道林
有銅牌記多識未來事云有一真人在冀川開
口張弓在左邊子子孫孫萬萬年江南中主名

其子曰弘冀吳越錢鏐諸子亦皆連弘字以應
之而

國朝宣祖諱乃正當之也

潛鶴鼓

臺城端門上二鼓初得於會稽雷門傳是越王
舊物擊之聲聞洛陽後孫恩亂兵擊破中有二
鶴冲天而去自是不復鳴後人呼爲潛鶴鼓楊
脩有詩云端門擊破使人驚潛鶴雙飛上玉清
恠得舊時聲太遠冲天合自九臯鳴

天水碧

南唐末時前數年宮人授薔薇水染生帛一夕
忘收爲濃露所漬色倍鮮翠因令染坊染必經
宿露之號爲天水碧宮中競服之識者以爲天
水趙之望也

獨足臺

陳末時有一鳥獨足飛上宮城臺上以觜畫地
云獨足上高臺盛草化爲灰欲知我家處朱門
當水開解者以謂獨足指後主獨行無衆盛草
言荒穢隋承火運草得火而灰及國破隋煬帝
館於都水臺所謂上高臺當水開也楊脩詩云
鳥跡分明在帝臺管絃聲裏輒書來回頭一覺
風流夢猶得朱門傍水開

識記門第八

靈異門第九

八功德水

蔣山悟真庵後按梅執亭記梁天監中有胡僧曇隱寓錫于此山中乏水時有庵眉叟相謂曰予山龍也知師渴飲措之無難俄而一沼沸成後有西僧繼至云本域八池已失其一似竭彼盈此也其泉一清二冷三香四柔五甘六淨七不饑八蠲病故名八功德水自梁已前嘗取給御厨又按楊脩詩注云高僧曇隱遊行於此忽聞金石絲竹之音俄見清泉一泓瑩澈甘滑有

積年疾者飲之皆愈

誌公鱠殘魚

高僧傳寶誌嘗對梁武帝食鱠帝曰朕不知味二十餘年師何為爾誌乃吐出小魚鱗尾依然今金陵尚有鱠殘魚

牝狙觸網

按相山野錄云南唐李後主獵青龍山一牝狙觸網見主兩淚稽顙屢指其腹主戒虞人保守之是夕誕二子還幸大理寺親錄囚繫一大辟婦以孕在獄未幾誕二子煜感此狙之事罪止

於流其山去城東二十五里

感龍產鯉

昔民有女感黑龍於田野歸而有娠後產鯉魚投於水中復能變化隨母所爾後乘雲而去母亡每春時必來墳所鄉人懼之因立廟祠焉謂之烏鯉廟在溧水縣東南二十五里

郗氏化蛇

郗氏梁武帝皇后也崩數月帝常追悼之晝則忽忽不樂宵乃耿耿不寐居寢殿聞外騷窸蘇切勃窸穴聲視之乃見一蟒盤踞上殿睽切再

文云暫睛呀張口兒以向於帝帝大驚駭無所
逃遁不得已蹶然而起謂蛇曰朕宮殿嚴警非
爾蛇類所生之處必其妖孽欲崇朕耶蛇為人
語啟帝曰蟒則昔之郗氏也妾以生存嫉妬六
宮其性慘毒怒一發則火熾矢射損物害人死
以是罪謫為蟒耳無飲食可實口無窟穴可庇
身飢窘困迫力不自勝又鱗甲有蟲咬子合啮
五絞肌肉痛苦其劇若加錐刀焉蟒非常蛇亦
復變化而至不以皇居深重為阻耳感帝平昔
眷妾之厚故託醜形骸陳露於帝祈一功德以

見拯拔也帝聞之嗚呼感激既而求蟒遂不復
見帝明日大集沙門於殿庭宣其由問善之最
以贖其苦誌公對曰非禮佛懺條悃款不可帝
乃然其言搜索佛經錄其名號兼親抒睿思灑
聖翰撰悔文共成十卷皆採摭佛語削去閑詞
為其懺禮又一日聞宮室內異香馥郁良久轉
美初不知所來帝因仰視乃見一天人容儀端
麗謂帝曰此則蟒後身也蒙帝功德已得生忉
利天今呈本身以為明驗也慇懃致謝言訖而
去此見梁武懺序

燕雀湖

輿地志云走馬橋見有燕雀湖窮神祕苑曰梁昭明太子在東宮有一琉璃盃紫玉杯皆武帝所賜也既薨詔置梓宮後更葬開墳爲闌人携入大航乃有燕雀數萬擊之因爲有司所縛乃獲二寶器帝聞而驚異詔以賜太孫封墳之際復有燕雀數萬銜土以增其上墳側今有湖後人因名燕雀湖楊脩有詩曰平湖岸側見高墳萬土銜來燕雀群鑑面無波天一色此中文藻似儲君在城東四里下入青溪

新洲

南史宋武帝伐荻新洲見大蛇長數丈射之傷明日復至洲裏聞有杵臼聲往覘之童子數人皆新衣於榛中擣藥問其故荅曰王爲劉寄奴所射合散傳之帝曰王神何不殺之荅曰寄奴王者不可殺帝叱之皆散收藥而反今薛家洲蓋其地也屬金陵鄉去城北四十里

生人獲

南史梁阮孝緒字士宗母王氏有疾合藥須得生人獲舊傳鍾山所出孝緒躬歷幽險累日不

逢忽一鹿前行隨後至一所遂滅就視其處果
獲此草今山中不復有之

木醴

建康實錄陳後主禎明二年初覆舟山及松栢
林冬月出木醴後主以爲甘露之瑞俗呼爲雀
餉今廢也

靈異門第九

神仙門第十

茅君山

茅濛字初成華陽人也隱華山修道秦始皇三
十一年白日上昇是時先有民謠曰神仙得者
茅初成駕龍上昇入太清時下去州戲赤城繼
世而往在我盈始皇聞之問故老曰此仙謠也
於是有尋仙之意濛之元孫盈得道於金陵句
曲山上昇爲東嶽上卿司命真人太元真人居
赤城時來句曲邦人改句曲爲茅君山事見圖
經云漢時有三茅君各乘一白鶴來居其上故

號爲三茅君世傳茅盈茅固茅衷皆茅濛之後也山在句容縣東南四十五里華山華陽縣荆公有詩云一峯高出衆山巔疑隔塵沙道里千俯視煙雲來不極仰攀蘿萼去無前人間已換嘉平帝地不誰通句曲天陳迹是非分草莽紛紛流俗尚師仙

仙人臺

慕府山之西有石碁盤說者云舊有仙人對弈於此故徐君平慕府山詩云仙去碁枰草自繁即此地也去城北二十五里

尋仙觀

梁時造也與芝山鸞洞相鄰上有石壇舊經云昔茅君行道之所唐垂拱五年道士宋文幹因石琢像重修壇焉在溧水縣東南六十里

太虛觀

舊經云東晉時李盤白遇仙於此修道白日上昇山頂有會仙亭唐開元五年建大中祥符元年九月奉

勅改今額在溧陽縣西南四十里盤白山下初名招仙觀

華陽洞

舊經云即第八金壇大洞天也唐改爲太平觀
在句容縣東南四十里茅山之側

華陽宮

舊經云張真人合丹之所也梁朝陶隱居立爲
華陽上館唐天寶七年改今額

鷲洞宮

舊經云梁普通三年晉陵縣女子錢妙真幼年
於此修行誦黃庭經積功三十年道成佩白練
飛入洞中有石室醮壇存焉天寶七年奉勅於

錢真人昇仙之所建宮度女道士洞在宮東一
百餘步

太平觀

梁書云陶弘景讀書萬餘卷善琴其各爲諸王侍讀
永明十年脫朝服掛神武門上表辭祿詔許之
於是止于句容之句曲山曰此是第八洞宮之
名金壇華陽之天乃立館自號華陽陶隱居唐
正觀九年爲昇真先生改爲太平觀

青元觀

舊經云本吳朝葛仙公宅也梁天監七年建有

一丹井在祠宇前去句容縣西南三百餘步

洞元觀

輿地志云赤烏二年吳大帝爲仙公葛玄造玄後白日上昇山上至今猶有壇宇楊脩有詩曰葛玄功行滿三千白日駭鸞上碧天留得舊時壇宇在後人方信有神仙觀在方山下去城四十五里

仙杏山

舊經云絕頂有杏林及仙人腳跡因以名之又
有仙壇石井故一名仙壇石山唐垂拱五年重
脩壇三所并石井聖曆二年縣令岑仲琢石爲
像設香燈供祀之下有清泉流入丹陽湖在溧
水縣東南四十三里

白都山

昔白仲都常於此學道白日上昇因以爲名楊
脩詩云駕鶴駭鸞自古聞策名仙籍是真君天
邊舊迹無尋處滿目青山空白雲在城南八里
西臨大江

石城洞

石頭城西嶺下南臨大江有洞宛然按真誥云

此小有洞之南門也

道士塢

蔣山明慶寺前乃陳宣帝禮元靖先生臧兢處
今在寶公塔之東

靜壇

舊經云宋侍中周捨立與道士塢相對帝問曰
其壇如何對曰風不鳴條雲無膚寸鹿巾黃帔
其數甚多白簡朱衣其來罕至因名曰靜壇今
按道士塢在蔣山古明慶寺前與八功德水相
近則靜壇當在其處

春磻

鍾山宋興寺東梁處士劉許字彥度隱居之所
楊脩詩云手拖葛屨坐梨林竹樹蕭然一水傍
枕上白雲船下月卜鄰東磻勝東崗

玉晨觀

句容縣東南四十五里句曲洞北門之側舊經
本晉許長史宅也昔高辛時展上公秦時巴陵
侯後漢時杜廣平並於此學道得仙梁武帝天監
十三年陶弘景奏請立為朱陽館唐正觀中為
紫微國師王先生改為華陽宮天寶七年為玄

靖先生改紫陽觀前有郭真人養龍池醮壇丹井俱在大中祥符中奉勅改今額

神仙門第十

寺院門第十一

吳建初寺

輿地志云吳赤烏十年沙門僧會自西竺來傳佛法吳大帝作寺自此起楊脩有詩曰僧會西來始布金常聞鍾磬伴潮音江南古寺知多少此寺獨應年最深舊傳在城南二百餘步

同泰寺

梁武帝改年號大同起同泰寺在臺城內窮竭帑藏造丈佛閣七層爲天火所焚梁帝捨身施財以祈佛福自大通以後無年不幸同泰寺設

四部無遮大會俄而侯景兵起陷城遂以虛器
進膳自庚辰至丙辰成七日不食而崩楊脩詩曰
佛事莊嚴國力疲照天金碧倚欄危沉檀爐上
煙雲合恰似當來煨燼時

蔣山大平興國禪寺

梁武帝天監十三年以錢二十万易定林寺前
岡獨龍阜以葬誌云永定公至以湯沐之資造浮
圖五級於其上十四年即塔前建開善寺今寺
即其地也唐乾符中改為寶公院南唐昇元中
徐德裕重修開寶三年後主改為開善道場太

平興國五年改賜本額慶曆二年府尹葉龍圖
清臣奏請為十方禪院按高僧傳及寶公實錄
公諱寶誌宋元嘉中現於東陽郡古木鷹巢中
朱氏婦聞巢中兒啼遂收育之因以朱為姓乃
施宅為寺焉公自少出家依于鍾山道林寺常
持一錫杖杖懸刀尺及鏡拂之類由是知名齊
梁間死而將葬梁武帝命陸倕製銘葬已賜玻
瓈珠以飾塔表南唐保大七年加號妙覺塔名
應世

本朝太平興國七年舒民柯萼遇老僧往萬歲

山指古松下掘之得石篆乃寶公記

聖祚綿遠之文於是遣使致謝謚曰寶公妙覺
治平初更謚道林真覺大師按建康實錄開善
寺有誌公履唐神龍初鄭克俊取之以歸長安
今洗鉢池尚在塔西二里法雲寺基方池是也
寺西有曰道光泉以僧道光穿斲斲竹足切得名
曰宋熙泉以近宋熙寺基之側有八功德水在
寺東悟真庵之後一人泉在寺北高峯絕頂寺
東山巔有定心石下臨峭壁寺西百餘步有白
蓮庵庵前有白蓮池乃策禪師退居之所寺後

向東有塔曰婁約即慧約婁禪師之塔高僧傳
云葬于獨龍山寶公之左是也舊有寶公及婁
約塔碑梁王筠撰文今不復存楊次公詩曰今
古忙忙利祿間幾人能此叩松關猿驚鶴怨不知
處虎踞龍盤空見山芳草路隨流水遠老僧心
共白雲閑淮南舊隱拋離久一誦移文一愧顏
荆公詩已見鍾阜下

半山報寧禪寺

王荆公故宅也其地名白塘舊以地卑積水爲
患自荆公卜居乃鑿渠決水以通城河元豐七

年公以病聞

神廟遣國醫診視既愈乃請以宅爲寺因賜額報寧禪寺寺後有謝安墩其西有土山曰培塿乃荆公決渠積土之地由城東門至蔣山此半道也故今亦名半山寺陳軒金陵集載荆公半山詩凡十五首寺中有寶禪師語錄序王旂撰米芾書

清涼廣惠禪寺

僞吳順義中徐溫建爲興教寺南唐昇元初改石頭清涼禪寺後主復改清涼大道場

本朝太平興國五年閏三月改爲今額舊傳嘗爲李氏避暑宮寺中有德慶堂今法堂前舊基是也後主嘗留宿寺中故其詩有未能歸去宿龍宮之句德慶堂名乃後主親書奈悟空禪師乃後主自爲文碑刻今見在舊有李氏宮人親寫藏經及本朝所賜

御書今皆不存唐溫庭筠清涼寺詩曰詩閣小窓藏雪嶺禪堂秋水接籃溪東坡先生捨彌陀畫像于寺中其詩曰問禪不契前三語施佛空

留丈六身蓋謂此也楊次公題清涼寺翠微亭
詩曰君勿愛清涼清涼如火如沸湯君勿惡炎
熱炎熱如冰如積堂勿愛亦勿惡未是逍遙處
君不見海會山前一條路一車來一車去今
古轉轅何日住落花時節雨初晴黃鸝枝上分
明語又因舟次秦淮寄清涼老曰雲居一衆舟
次秦淮忽尔狂風動地白浪滔天致此片帆難
以寸進又恐是石頭老子把定要津不肯放過
今者食時已及香積未充更不敢遣化菩薩去
干煩若是靈利人必已會得了也時王荆公在

清涼寺見之云清涼應是推辭不得

昇元寺

亦名瓦棺寺

昇元寺即瓦棺寺也在城西隅前瞰江面後踞崇
崗最爲古迹累經兵火略無髣髴李王時昇元
閣猶在乃梁朝故物高二百四十尺太白詩所
謂日月隱檐楹是也此見今西南隅戒壇乃是
故基南唐將歸我

宋數年前昇元寺殿基掘得石記乃詩識其辭
曰若問江南事江南事不憑抱鷄昇寶位謂李煜
酉年走犬出金陵謂王師甲子建居南極曹彬
生也

城南乃安仁秉夜燈謂潘美恐有伏東陵驕小

子建也文騎虎渡河冰浙以戊寅年入朝盡戲瓦棺

寺之名起自西晉長興年中長沙城阿陸地生

青蓮兩朵民間聞之官司掘得一瓦棺開見一

僧形兒儼然其花從舌根頂顱生出詢及父老

父老曰昔有一僧不說姓名平生誦法華經萬

餘部臨死遺言曰以瓦棺葬之此地所司具奏

朝廷乃賜建蓮華寺五代兵火焚之李太白登

瓦棺閣極眺金陵城云鍾山對北戶淮水入南

榮漫漫雨花落嘈嘈天樂鳴兩廊振法鼓四角

吟風筆香出霄漢上仰攀日月行山空霸氣滅

地古寒陰生寥廓雲漢晚蒼茫宮觀平門餘閭

闔寺樓識鳳凰名雷作百山動神扶萬拱傾靈

光何足貴長此鎮吳京

大愛敬寺

梁武帝普通元年造在蔣山之北高峯上唐乾

符間重修廣明元年改為廣明愛敬禪院南唐

改廣孝禪院

本朝開寶七年移額入城中今壽寧寺是也李

建勳愛敬寺詩其略云雲散經窻濕山晴石路香

法寶寺亦名臺城寺

梁同泰寺基之半也建康實錄梁武帝大通元年創同泰寺寺處宮後別開一門名大通門對寺門取逆語以協同泰為名帝晨夕講議多遊此門偽吳順義二年置為臺城千福院

本朝改賜今額寺前有醜石四各高丈餘俗呼為三品右政和間取歸京師其寺今在城北

法光寺苑今名鹿

即梁之蕭帝寺舊傳天監十三年造元絳寺記云不知從昔之名故後人以帝氏目之南唐保

大間重建後主易名曰法光寺有子隱堂郝氏窟今隸祥鸞坊

本朝勅改鹿苑寺

棲霞禪寺

攝山齊明僧紹故宅也按棲霞寺江摠碑云齊居士平原明僧紹宋泰始中遊此山乃刊木結茅二十許年有法度禪師與僧紹甚善僧紹遂捨宅成此寺蓋齊永明七年正月三日也唐高宗嘗建寺碑并書寺額武宗會昌中廢宣宗大中五年重建

本朝太平興國五年改爲普雲寺景德五年改賜景德棲霞禪寺寺有舍利塔乃隋文帝葬舍利處南唐高越林仁肇建塔徐鉉書額曰妙因寺左有千佛嶺乃明僧紹子仲璋創造齊文惠太子同僧琢梁臨川靖惠王采飾寺後有天開巖碧鮮亭白雲庵迎賢石醒石中峯潤石房白雲泉亦名品外泉寺前有明僧紹高越墓菩提王廟菩提王即攝山靳神也廟舊居山前今移置寺右

仁廟朝嘗賜金寶方牌熙寧間取寄華藏寺中石佛額有玻璃珠後墜地因置閣盛之大觀中爲權要取去米芾嘗作詩紀其事寺今有唐高宗陳尚書令江總碑沈傳師齋疏及沈傳師徐鉉題名按陳軒金陵集劉長卿顧况李紳皮日休韓熙載徐鉉徐鉉柳俛權德輿皆有詩德輿詩其略云縈紆松路深繚繞雲山曲重樓回木杪古像鑿巖腹皆山中景也今去城四十五里

祈澤寺

寺記云宋少帝景平元年建去府城二十里梁朝置龍堂有初法師者來結茅庵於山下日夜

誦法華經有一女郎來聽移時方去師訝之因
問其住止女曰兒東海龍女遊江淮間聞師誦
經來聽之師曰此山乏水汝能神變爲我開一
泉可乎女曰此固易事容兒歸白父言訖不見
數日後忽作風雷良久有清泉涌於座中南唐
保大中以久旱祈雨於舊寺基信宿而雨作自
後以爲祈禱之所

本朝治平改賜祈澤治平寺許堅嘗有二詩其
後王荆公題云高人遺蹟空佳句誰識旌陽後
世孫

鐵索寺

本東晉尼寺也尚書仲呆女見釋書有比丘尼
問講師師曰女子削髮出家爲比丘尼後因鐵
索羅國尼至遂就此建尼寺以鐵索羅爲名中
國尼自此始

明慶寺

蔣山上明慶寺後別有小嶺碧石青林幽邃如
畫世人呼爲屏風嶺有高僧隱於此忽聞絲竹
之音俄而有清泉一派瑩徹甘滑有積年疾者
服之愈梁己前嘗取給御厨水俗呼爲八功德

水楊脩有詩云翠壁如屏早不枯一泓甘滑飲
醍醐高僧到此聞絲竹還有金鱗對躍魚

佛窟寺

城南二十里牛頭山下有深坑言是辟支佛窟
寺記本沙門道慶禪房梁天監中司空徐慶造
寺因名曰佛窟楊脩有詩云曩事何人爲證明
白雲深鎖翠微坑已聞過去辟支佛未見當來
彌勒生

普濟寺

舊名頭陀寺

梁頭陀寺也建康實錄梁武帝大同元年置頭

陀寺記舍人石興造寺在蔣山頂第一峯後移
置山下

本朝治平中改賜今額殿後有應潮井其水與
江潮相應及有梁昭明太子讀書臺在其西即
奢通元年所置大愛敬寺基也

淨妙寺

舊名齊安寺

南唐昇元中建額曰齊安

本朝政和五年正月改賜淨妙舊臨官路今移
置高壠面秦淮王荆公齊安寺詩刻云日淨山
如染風暄草欲薰梅殘數點雪麥漲一溪雲去

城四里

寶林寺

舊經云木同行寺梁天監中武帝與寶公同遊此山見林巒殊勝命建精藍因以同行爲額亦名聖遊寺唐會昌中廢僞吳太和中復建後改爲秀峯院南唐保大九年重修

本朝嘉祐中改賜今額有琪樹在法堂前梅摯詩其略云影借金田潤香隨壁月流遠疑元帝植近想誌公遊建炎間樹爲兵火所焚今寺屬寶林山

寶乘院亦名草堂

齊草堂寺也寺乃齊周顒隱居之所顒復出仕孔稚圭作北山移文以譏之高僧傳云時有釋慧約姓婁少達妙理顒素所欽服迺於鍾山舊館造草堂寺以居之今寺左乃婁約置臺講經文之地寺後即顒舊居也王荆公草堂寺詩云周顒宅作阿蘭若婁約身歸窳堵坡唐會昌中寺廢

本朝復建治平間改賜今額隸鍾山卿去城十一里

聖湯延祥寺

隸湯山下舊有湯泉十所今存者六唐德宗時韓晉公滉爲浙江觀察使滉小女有惡疾浴於湯應時而愈乃以女糶奩建精舍於湯山之右且求僧以主寺事時得竹林寺一市蠱毒藥僧遠近賴之多獲全濟故其藥至今以溫湯爲名按唐書滉觀察浙江在貞元已前寺之建當在建中興元間而圖經乃云咸通十二年韓公置精刹咸通蓋懿宗年號是時晉公已亡也

景德寺

僞吳始名崇孝寺

本朝景德中改賜今額建炎元年以其地改充太廟今隸嘉瑞坊

長干寺

今名天禧寺

丹陽記大長干寺道西有張子布宅在淮水南對瓦棺寺南張侯橋也長干是秣陵縣東里巷名江東謂山隴之間曰干建康南五里有山岡其間平地庶民雜居有大長干小長干東長干並是地名小長干在瓦棺寺南巷西頭出大江梁初起長干寺按塔記在秣陵縣東今天禧寺

乃大長干也昔有并州胡薩訶死經七日更生
阿育王塔可荆公有詩云梵館清閑側布金小
塘回曲翠文深柳條不似千絲直荷葉相依萬
蓋陰淡淡岑雲相上下翩翩沙鳥作浮沉羈人
樂此忘歸意忍向西風學舊吟

能仁寺

南唐古寺基也保大年中昇州特進守司徒致
任鍾山公李建勳嘗捨莊田入寺後廢

本朝撥賜地基起興慈禪院威平初李建勳女
潤州本起寺任持臨壇精律大德尼進暉申明

乞以故父李相公舊所施莊田入興慈寺至今
供常住也咸平後改承天寺崇寧間又改天下
承天為能仁寺

真宗皇帝賜昇州法主圓覺大師賜紫德明七
言二韻詩一首詩曰精勤演律達真風釋子南
禪道少同南中多長奧旨筌蹄悟佛理慧燈廣
布九圍中真蹟今藏本寺

寺院門第十一

廟宇門第十二

吳大帝廟

隸府城西門外今廟庭即當時舊宮唐大中初
邑人台州永寧簿周知業以家貲重修建炎間
兵火廢毀其地在石頭城清涼寺之西今去府
七里楊脩有詩云古木陰森廟巋然龍蟠虎踞
舊山川當時鼎足一場夢空裏旋風飛紙錢

蔣帝廟

帝即後漢秣陵尉蔣子文金陵圖經云漢末子
文爲秣陵尉逐盜鍾山北傷額而死嘗自謂骨

貴死當爲神及吳大帝遷都建鄴子文乘白馬
執白羽扇見形故吏白吳帝爲立廟不爾百姓
大疫權猶未信翌日復見於路云當令飛蟲入
人耳後如其言帝乃立廟于鍾山封子文爲蔣
侯權避祖諱因改鍾山曰蔣山晉蘇峻之難鍾
山神同蔣侯爲助且曰蘇峻爲逆當共誅鋤之
後果斬峻按杜佑通典宋高帝永初二年普禁
淫祀自蔣子文祠以下皆絕孝建初修復加蔣
侯爵位至相國大都督中外諸軍事明帝初四
方兵起求救於神遂封爲蔣王齊永明中崔慧

景之難迎神還臺以求福助事平授以帝位又
按南史梁武帝天監六年旱甚詔祈蔣神求雨
十旬不降帝命載荻焚其廟當神上俄有雲如
繖倏忽驟雨如瀉臺中宮殿振動帝懼馳詔追
停少時乃靜自此帝益畏信是時魏軍圍鍾離
蔣帝神報勅必許扶助旣而無雨水長遂挫敵
人凱旋之後廟中人馬脚盡泥濕當時目覩焉
齊旣封以帝號於是以廟門爲靈光之門中門
爲興善之門外殿曰帝山內殿曰神居西閣有
佛殿名靈鷲東閣即子文所居也南唐追謚曰

莊武帝更修廟宇開寶八年焚毀雍熙四年邑人張革於舊基重建景祐二年知府陳待制執中復增修之

朝廷賜廟額曰惠烈政和八年本縣復加修飾有南唐及景祐政和廟記可攷今隸蔣山之北去城十二里

晉元帝廟

舊在下將軍廟側今移在嘉瑞坊城隍廟之左

武烈帝廟

舊經云隋司徒陳果仁有戰功唐封忠烈公僞

冊武烈帝本廟在江夏

楚平王廟

吳越春秋云楚平王都於固城廟今在溧水縣南九十里昔周成王封熊繹子男之田於蠻荆之地至莊王時賜姓為芊音楚姓氏至靈王立與敵日尋干戈邊鄙不寧時吳軍失利乃陷濳渚至平王用佞臣之言殺太傅伍奢并其子尚子胥奔吳吳用之破楚而入郢此廟即平王之舊址也唐廣明元年重修

晉謝將軍廟

即晉謝玄也咸通九年置開寶四年重修在府城西南三里

晉卞忠正廟

晉尚書令贈侍中驃騎將軍卞壺謚忠正蘇峻之亂與其二子力戰死之葬吳冶城今天慶觀乃其地也後七十餘年盜發其墓尸僵如生鬚髮蒼然爪甲穿手背安帝賜錢十萬封之入梁復毀武帝又加修治李氏有江南建中正亭於其墓穿地得斷碑公名存焉徐鍇實爲之識本朝慶曆中知府事龍圖閣直學士葉公清臣

又封墓刻石表之改亭名曰忠孝取其母之言白父爲忠臣子爲孝子也又五十年左丞葉公夢得來守是邦即亭爲堂圖公像列之常祀春秋祠焉乃爲之記

晉陰山廟

在縣南向西十二里舊經云建武中丞相王導於崗阜間隱約見數十步騎駐立於壠上導恠之使人致問俄失其所夜見夢於導曰我乃陰山神也昨隨帝渡江寓泊于晨見之所卿爲我置祠當福晉祚導乃以其事聞上置廟於此仍名

其岡爲陰山楊脩詩曰爐香煙斷暮雲凝陰德
山高衆所稱開府琅邪舊蒙福龍飛一馬至中興

梁祈澤夫人廟

梁置今隸祈澤寺之側舊經云有初法師者嘗
講法華經於山中有女郎來聽初問之荅曰兒
東海龍王女也師告以山中乏水後數日忽聞
風雨暴作向曉有泉出於座下後遂爲水旱祈
禱之所因號祈澤夫人紹興元年旱禱有應本
府狀其事于
朝且言已有祈澤夫人之號因

賜廟額曰嘉惠今去城二十三里

青溪夫人廟

按輿地志青溪岸側有神祠世謂青溪姑南朝
甚有靈驗嘗見形於人祠今與上水閘相近說
者云隋平陳斬張麗華孔貴妃於青溪柵下今
祠像有三婦人乃青溪姑與二妃也

潘真君廟

舊經云昔潘氏兄弟三人於此山中得道化白
鶴冲天後人思而立廟在溧陽縣東南六十里
三鶴山下

茅君白鶴廟

茅山白鶴廟記云此廟即祠三茅君之所也霓旌屢降鶴駕時逢茅君分理于赤城玉洞每年以十二月二日駕白鶴於此會諸真君故名焉在句容縣東南三里

荆將軍廟

舊經云荆軻廟也烈士傳曰昔左伯桃羊角哀往楚併糧于梁山左伯桃死而角哀達乃厚葬伯桃於梁山下一夕角哀夢伯桃告曰幸感所葬奈何與荆將軍墓相鄰每地下與吾戰為之困迫今年九月十五日將大戰至時望于借兵馬於冢上叫噪相助角哀覺而悲之如期而往曰今在冢上安知我友地下之勝負焉乃命開棺自刎而死報併糧之義也廟在溧水縣南四十五里

茅司徒廟

按稽神錄云浙西僧德林少時遊舒州路見一夫荷鋤治方丈之地左右數十里不見居人問之對曰頃時自舒之桐城至此暴得店疾不能去因卧草中及稍醒已昏矣四望無人惟虎豹

吼叫自分必死俄有一人部從如大將至此下馬良久召二卒曰善守此人明日送到桐城縣下遂上馬去倏忽不見惟二卒在焉某即強起問之荅云此茅將軍也常夜出獵虎憂汝被傷故使護汝更欲問即曰已出矣不復見其二人即起而行意甚輕健至桐城頃之疾愈以所見之處立祠祀之德林止舒州十年及迴則村落皆立茅將軍廟今俗呼茅司徒在溧陽縣東門外一里

菩提王廟

神即楚大夫靳尚也今在攝山按神錄楚靳神居臨沂縣舊經云齊永明初有法度禪師講經於攝山嘗患山路磽确僧徒疲於往來神為平治之法度因為受菩提戒立祠於彼故世號菩提王江揔棲霞寺碑云梁大同元年二月神又見形着菩薩巾披袈裟容止甚都來入禪堂請寺眾說法廟舊在山前今移置棲霞寺門之右

二判官廟

舊經云本延祚院土地神唐會昌中寺廢景福二年神託夢於里人曰我二判官也久為延祚

寺伽藍今已遷次於寺外可爲我置祠當福於爾旣而夜見火光連天人即潛於光所窺見炬篋熒熒焉因就其地建廟而祀之在府西門裏

楚靳尚廟

攝山記云楚靳尚以讒殺屈原爲天所譴作一大蟒穴在山後人爲之立廟楊脩有詩云汨羅魚腹葬靈均競渡如飛不救人天意明知讒口毒果遭天譴作蛇身

五龍堂

府城西門外古太一觀基也南唐保大八年改

爲舞雩祠十三年有玄元尊像乘一木自江中流況及岸而止道衆迎接入堂供事之徐鍇嘗作記述其事

興德王廟

僞吳天祚二年李先主昇夢中見其神因立廟祠今廢其地在鍾山蔣帝廟之北去城十三里

炳靈公廟

僞唐昇元中置按五代史後唐長興四年封東嶽三郎爲威雄將軍大中祥符元年奉勅封炳靈公廟在府城新橋之西

張僕射廟

舊經云唐天祐中有清河張司徒者營建金陵百姓懷而祠之今呼張僕射廟廟之北相去四里有南唐張懿公墓道或云僕射即懿公也名君詠字德之嘗為特進太子太傅初不曾任司徒其說未詳今在府城西門外十里

廟宇門第十二

墳陵門第十三

吳大帝陵

吳志神鳳元年大帝崩葬蔣陵按樂史寰宇記在縣東北蔣山八里丹陽記云蔣陵因山為名輿地志云九日臺當孫陵曲折之傍故名蔣陵亭晉蘇峻之亂王師敗績于西陵即此地也今蔣廟相對向西有曰孫陵岡是為蔣陵

吳步夫人陵

吳志赤烏元年追拜夫人步氏為皇后後合葬蔣陵今蔣廟西南有孫陵岡上有步夫人墩墩

之側有夫人冢乃其地也

吳宣明太子墳

吳志孫權皇太子登謚宣明太子初葬句容後三年移葬鍾山西蔣陵

吳甘寧墓

伏滔記吳將甘寧墓在直瀆之下俗云墓有王氣孫皓惡之鑿其後爲直瀆温庭筠過吳主陵詩其略云虛開直瀆三十里青蓋何曾到洛陽蓋譏之也

吳葛仙公墓

吳太極左仙翁葛玄墓在句容縣西南一里郡國志云句曲有葛玄冢

晉元帝陵

建康實錄晉元帝永昌元年春葬建平陵在鷄籠山之陽不起墳

晉明帝陵

建康實錄晉明帝太寧三年葬武平陵在鷄籠山之陽不起墳

晉成帝陵

建康實錄晉成帝咸康八年葬興平陵在鷄籠

山之陽與元帝同處不起墳

晉康帝陵

建康實錄晉康帝建元三年葬崇平陵隸鍾山之陽不起墳

晉穆帝陵

建康實錄晉穆帝升平五年葬永平陵隸幕府山之陽起墳今幕府山前近西里俗相傳有穆天子墳即其地也

晉哀帝陵

建康實錄晉哀帝興寧三年葬安平陵隸鷄籠

山之陽不起墳

晉簡文帝陵

建康實錄晉簡文帝咸安二年葬高平陵在鍾山之陽不起墳

晉孝武帝陵

建康實錄晉孝武帝太元二十一年葬隆平陵在鍾山之陽不起墳

晉安帝陵

建康實錄晉安帝義熙十四年崩明年葬休平陵在鍾山之陽不起墳

晉恭帝陵

建康實錄晉恭帝元熙二年葬冲平陵任鍾山之陽安帝同處不起墳按東晉十一帝元明成哀四陵在鷄籠山之陽康簡文武安恭五陵在鍾山之陽並不起墳今不復可辨惟穆帝一陵在幕府山起墳

晉山簡墓

建康實錄晉永嘉六年征南將軍荊州刺史山簡卒歸葬建康真武湖南覆舟山之陽輿地志云山簡墓在樂遊苑內

晉溫嶠墓

建康實錄晉溫嶠初葬豫章朝廷追思之乃爲造大墓還葬元明陵北幕府山之陽按晉書嶠拜驃騎將軍開府儀同三司散騎常侍封始安郡公初葬豫章後朝廷追嶠勲德將爲造大墓於元明二帝陵之北陶侃上表願停移葬詔從之其後嶠妻何氏卒子放之便載喪還詔葬建平陵北即是嶠妻何氏墓非嶠墓也

晉郭璞墓

真武湖中有大墩里俗相傳曰郭璞墓按晉王

敷加荊州牧敷將舉兵使璞筮璞曰無成敷怒收璞斬之當時或歸葬於此

晉筮使君墓

隸金陵鄉張陣湖墓前有二碑以晉書參考之乃寧朔將軍筮瑤嘗為相溫部將太和五年破袁瑾於武丘

宋武帝陵

建康實錄宋高祖永初三年葬初寧陵隸丹陽建康縣蔣山圖經云在縣東北二十里政和間有人於蔣廟側得一石柱題云初寧陵西北隅以此考之其墳當去蔣廟不遠

宋文帝陵

建康實錄宋文帝元嘉三十年葬長寧陵圖經云隸縣東北二十五里與武帝陵相近今未詳所在

宋文帝袁后陵

南史宋元嘉十七年葬先皇后袁氏于長寧陵長寧即文帝陵也

宋明宣沈太后陵

南史宋明宣沈太后為文帝美人生明帝元嘉

三十年葬建康之幕府山今寶林寺西南有墳
壠相傳爲國婆墳疑即沈后所葬之地

宋明帝陵

建康實錄宋明帝泰豫元年葬高寧陵隸臨沂
縣幕府山西與王導墳相近今山前有墳壠晉
穆帝陵在山南或以西爲明帝之墓

大司徒甄邯墓

圖經云在縣北七里後湖之側按南史宋張永
嘗開真武湖過古冢冢上得一銅斗有柄文帝
以訪朝士何承天曰此斗王莽三公亡皆賜之
一在冢外一在冢內時三台居江左者惟甄邯
此必邯之墓及啟冢又得一斗復有一石銘云
大司徒甄邯之墓今未詳所在

宋謝濤墓

按土山淨名寺新得古碑云宋散騎常侍謝濤
元嘉七年葬于揚州丹陽郡建康縣東鄉土山里
宋謝濤夫人王氏墓

夫人琅邪王氏大明七年合祔于土山里謝濤
之墓有古碑可考夫人之祖曰獻之父曰靜之

冥漠君墓

宋書云元嘉七年彭城王義康修東府城城塹中得古冢爲之改葬使法曹參軍謝惠連爲祭文其略云東府掘城北塹八丈餘得古冢上無封域不用執甕銘志不存世代不可得而知也公命城者改埋東岡祭之以豚酒旣不知其名字遠近故假爲之號曰冥漠君云爾

齊明欽劉皇后墓

南史齊明欽劉皇后高帝爲明帝納之永明七年葬江乘縣張山今隸淳化鎮之北

齊獻武公墓

隸攝山棲霞寺前明隱君僧紹舊居攝山後因葬此今去城四十五里

梁吳平忠侯墓

南史梁吳平忠侯蕭景字子照謚曰忠墓在花林之北有石麒麟二石柱一題云梁故侍中中撫將軍間府儀同三司吳平忠侯蕭公之神道今去城三十五里

梁始興王墓

南史梁始興王蕭憺謚曰忠武墓在清風鄉黃城村有石麒麟四及神道碑云梁故侍中司徒

驃騎將軍始興忠武王之碑今去城三十七里

梁安成王墓

南史梁安成王蕭秀字彥達謚曰康墓在甘家巷有石麒麟二石柱一及神道碑二題云梁故散騎常侍司空安成康王之神道南史稱佐史夏侯亶等表立墓碑誌王僧孺陸倕劉孝綽裴子野各製其文欲擇用之而咸稱實錄遂四碑並建今所存者二其一已磨滅其一字畫猶可讀乃彭城劉孝綽文也去城三十八里

梁臨川王墓

南史梁臨川王蕭宏字宣達謚曰靖惠墓在城鄉有石柱碑二題云梁故史黃鉞侍中大將軍揚州牧臨川靖惠王之神道去城三十里

梁建安侯墓

南史梁建安侯蕭正立謚曰敏墓在淳化鎮西宋野石柱塘有石柱二題云梁故侍中左衛將軍建安敏侯之神道去城三十五里

陳高祖陵

建康實錄陳高祖永定三年葬萬安陵隸縣東南古彭城驛側今縣東崇禮鄉地名陵里有曰

天子林其地有石麒麟二里俗相傳即陳高祖墓也去城二十五里

陳文帝陵

建康實錄陳文帝天康元年葬永寧陵隸縣東北陵山之南今鷹門山之北

左伯桃墓

烈士傳曰左伯桃羊角哀燕人也二人爲友同時遊學聞楚王待士乃同入楚至梁山值雨雪糧少伯桃乃併糧與角哀令往事楚自入于空樹一
中餓死角哀至楚爲上大夫乃告楚王備禮

葬左伯桃於此唐大曆六年魯公顏真卿經此以詩弔之書於菑塘在溧水縣南四十三里

雙女墓

雙女墳記曰有鷄林人崔致遠者唐乾符中補溧水尉嘗憇于招賢館前岡有家號曰雙女墳詢其事迹莫有知者因爲詩以弔之是夜感二女至稱謝曰兒本宣城郡開化縣馬陽鄉張氏二女少親筆硯長負才情不意爲父母匹于鹽商小豎以此憤恚而終天寶六年同葬於此宴語至曉而別在溧水縣南一百一十里

南唐張懿公墓

公名君諱字德之有神道碑題云大唐順天翼
運功臣特進守太子太傅上柱國清河郡開國
張懿公神道去府城十里在石頭城後

南唐李順公墓

公名金全字德鏐有神道碑題云唐故開府儀
同三司檢校太尉兼侍中贈中書令李順公神
道在城西金陵鄉七里鋪

南唐高越墓

攝山棲霞寺舊門外北山之麓有石題云侍郎

高府君墓去縣四十五里

墳陵門第十三

碑刻門第十四

吳孫皓封禪碑在常州宜興縣封禪山磨崖而刻今尚存

吳天璽元年紀功三斷石碑皇象書

晉侍中右光祿大夫西平靖侯顏公大宗碑公名舍字弘都今在府學顏真卿書

晉右光祿大夫西平靖侯顏府君碑真卿書今在府學

晉建威將軍忠平縣侯竺使君銘在金陵鄉張陣湖

晉建威將軍忠平縣侯竺使君頌在張陣湖碑

石始以斷

宋謝濤夫人王氏墓記在上山淨名寺後菜園
中今移在上元縣

齊侍中尚書令巴東獻武公碑在黃城村梁普
通三年造

梁侍中司徒驃騎將軍始興忠武王碑徐勉造
貝義淵書在清風鄉黃城村

梁散騎常侍司空安成康王碑劉孝綽撰貝義
淵書在清風鄉甘家巷

大唐沈傳師齋疏徐鉉題名在棲霞寺千佛嶺
大唐王法主碑鳳閣侍郎同鳳閣鸞臺三品弘
文館學士劉禕之文唐文明元年立在茅

山崇玄觀

大唐紫陽觀碑太子右諭德徐鉉文尚書虞部
郎中楊元鼎書并篆額在茅山玉晨觀

大唐玄靖先生李含光碑湖州刺史魯郡公顏
真卿文并書在玉晨觀

大唐遙寓茅山孫尊師詩碑唐司空兼門下侍
郎平章事李德裕述前知鹽鐵轉運使上

柱國裴質方書在玉晨觀

大唐三洞景昭大法師韋君碑檢校國子司業
吳縣開國男陸長源文檢校尚書兵部郎
中兼侍御史竇書并篆額唐貞元三年
立在玉晨觀

大唐下泊宮記觀察判官監察御史裏行王師

簡文弘文館校書郎段令緯篆額在玉晨觀

大唐許真人井銘徐鉉文并書在玉晨觀

大唐祠宇宮白鶴廟記大曆十三年三月立尚

書水部員外郎河東柳識文華陽崖舍退

士中山劉明素書在鴻禧院

大唐義女碑李白文在溧陽縣賴陽江北

偽吳興化院銅鐘鑄文徐溫鑄在丹陽鄉香林寺

偽吳矻石鑄文順義元年鑄在靖安鎮

南唐方山寶華宮碑在方山崇真觀

南唐洞元觀請鐘記在崇真觀

南唐寶華宮功德什物記在崇真觀

南唐李順公神道碑高越書在石頭城北

南唐張懿公神道碑朱銑書在石頭城後

南唐蔣莊武帝廟碑徐鉉撰朱銑書圖經云已

亡今碑石在蔣廟門外此圖經之誤也
南唐夫人易氏墓誌額在土山淨名寺

南唐李後主祭悟空禪師文并親書德慶堂三字在清涼寺

南唐開善寺并記在蔣山寺

南唐義井欄刻字在石頭城後七里鋪

南唐僧用虛棲霞寺詩在本寺千佛嶺

景德棲霞寺殿記在本寺高陟撰

景祐重造蔣廟碑凌陽景撰今置蔣廟庭下

惠烈廟記在蔣廟曹熙立

蔣廟篆祭文蔣堂文邵必篆今在廟中

道光泉記王安國撰在蔣山寺

八功德水記梅摯撰在蔣山悟真庵後

蔣山太平興國寺莊田記僧贊元立

蕭帝寺記元絳撰在法光寺今名鹿苑寺

子隱堂記梅摯撰在法光寺

白雲庵記王安國撰在棲霞寺

寶禪師誦錄序朱芾書在惟政鄉半山寺

宋齊丘恩臺山詩刻在保寧寺

溧陽長潘元卓校官碑今在溧水縣

漢碑附此

碑刻門第十四終

高陽許嵩作建康實錄文多汗漫參考者疲
於省閱新安張養正哀舊史而爲六朝事迹
編類部居粲然俾江左三百餘年之故實昭布
方冊非博雅好古未易成此書也余叨守建
康養正適以議郎居幕府因取其書刊於此
邦養正名敦頤婁專侯泮以文章道義爲學
者之所矜式此特餘事爾紹興庚辰立冬日

東魯韓

仲通

書



